

2,643 Page

# kes curi elektrik direkod

**Kuala Lumpur:** Angka menggusarkan apabila 2,643 kes kecurian elektrik untuk melombong mata wang bitcoin direkodkan bagi tempoh Januari hingga November tahun ini.

Jumlah itu angka tertinggi direkodkan setakat ini berbanding 2,465 kes tahun lalu, 1,043 kes (2019) dan 610 kes (2018).

Ketua *Strategic Business Units* (SBU Meter) Tenaga Nasional Berhad (TNB), Kamarul Azam Abu Kassim berkata, kes kecurian elektrik untuk perlombongan bitcoin meningkat ketara semasa Perintah Kawalan Pergerakan (PKP) bagi mengekang penularan Covid-19.



**Kes kecurian elektrik untuk aktiviti bitcoin sudah bermula sejak 2015 susulan peningkatan harga mata wang itu di pasaran”**

**Kamarul Azam**

Ketua, Kelengkapan Meter

Katanya, kekangan petugas TNB untuk membuat pemantauan dan pemeriksaan selain kebanyakan sektor ekonomi tidak beroperasi memberi peluang kepada sindiket mempergiatkan lagi kegiatan mereka.

“Sebenarnya kes kecurian elektrik untuk aktiviti bitcoin sudah bermula sejak 2015 susulan peningkatan harga mata wang itu di pasaran, menyebabkan pengusaha bitcoin mula mencari tapak komersil untuk menjalankan perniagaan mereka.

“Namun perniagaan dijalankan dengan cara mencuri elektrik dari bekalan sedia ada,” katanya.

Menurutnya, penyambungan elektrik secara haram boleh menyebabkan kerosakan dan kegagalan sistem bekalan elektrik sehingga berisiko berlakunya kebakaran.

“Penggunaan elektrik berlebihan yang tidak mengikut piawaian ditetapkan mengakibatkan berlaku percikan arka pada pemasangan TNB di kotak agihan (feeder pillar) dan pencawang.

“Akibat perbuatan pihak tidak bertanggungjawab ini, bekalan elektrik terputus dan mengganggu kehidupan serta aktiviti perniagaan pengguna lain,” katanya.